




Rabu, 21 Oktober 2020

Ogen: 2 Tesalonika 3 : 3-5



Kinigenggeng Kristus Jadi Ulu Gegeh



Sada turi-turin geluh Bob Wieland, sekalak veteran perang Vietnam. Ia ikut lomba lari marathon New York City tahun 1986, ia seh garis finis alu waktu 4 wari, 2 jam, 47 menit ras 17 detik. Enda me waktu si dekahna i bas sejarah marathon janah ia seh ku garis finis si terakhirna i bas kerina peserta. Kepeken ia kiam alu make tanna sabap nahena enggo iamputasi erkiteken kena ranjau waktu perang Vietnam tahun 1968 sanga ia jadi tentara Amerika. Bagenda me tutusna ras megenggengna ia ngikuti maraton enda labo soal ia dat juara tapi seh ia ku garis finis amin si terakhirna kal pe.

Perdalanen geluh manusia la ise pe metehsa, tapi i bas sie selaku kalak si erkiniteken tetap ngandalken Tuhan sabap Tuhan setia i bas kerina perbahanenna. Si arus ilakoken manusia eme ngerespon Padan Dibata e alu tetap tutus ras megenggeng. La sitik perbeben, kiniseran ras tantangan geluh si man alanken manusia si megati erbahan ia ngelabuh seh la ngasup ersaing, ngadi i tengah dalam la seh ku garis finis. Kepeken jadi perenungen man banta turi-turin geluh Bob ndai, labo kepe jadi juara si jadi perayakenna, labo dalih si terakhir i bas pertandingan e tapi seh ku garis finis.

Megenggeng, jadi kata kunci, e jadi ulu gegeh, semangat seh ku garis finis janah man kalak si erkiniteken gegeh ras keleng ate Kristus jadi sada penjemba ras semangat si luar biasa. Amin megati kita latih, kote, ula ngadi i tengah dalam, teruskenlah ndalani 'rute' si enggo iaturken pelaksana permainan. Adi panitia ntah lanai timaina kerina tapi Kristus timaina seh kerina peserta pertandingan e lit denga ibas arena permainan. Emaka selaku Moria, desken pertandingan lari, marathon, ula kal sempat kita ndarat i bas arena pertandingan e nari, usur-surlah amin la banci pedas bagi kalak sideban, usahaken seh ku garis finish.

